



Na osnovu člana 2.9 stav (1) tačka 2. Izbornog zakona Bosne i Hercegovine ("Službeni glasnik BiH", broj: 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20), a u vezi sa članom 4. stav (1) Zakona o finansiranju političkih stranaka ("Službeni glasnik BiH", br. 95/12 i 41/16), Centralna izborna komisija Bosne i Hercegovine je na 1. sjednici, održanoj 13. 01. 2022. godine, donijela

U P U T S T V O

O DONOŠENJU FINANSIJSKOG PLANA I PROGRAMA UTROŠKA SREDSTAVA POLITIČKE STRANKE

Član 1.

(Predmet)

Ovim Uputstvom propisuje se postupak donošenja finansijskog plana, utvrđivanje programa utroška sredstava, koji su političke stranke obavezne dostaviti Centralnoj izbornoj komisiji Bosne i Hercegovine (u daljnjem tekstu: Centralna izborna komisija BiH) i postupanje političke stranke sa utvrđenim programom i finansijskim planom.

Program utroška sredstava obuhvata troškove svih aktivnosti političke stranke u kalendarskoj godini, uključujući i troškove izborne kampanje, ukoliko se u toj godini provode izbori za organe vlasti na svim nivoima u Bosni i Hercegovini.

Član 2.

(Donošenje finansijskog plana i utvrđivanje programa utroška sredstava)

- (1) Politička stranka dužna je do kraja tekuće godine donijeti finansijski plan i utvrditi program utroška sredstava za narednu kalendarsku godinu.
- (2) Program utroška sredstava mora donijeti nadležni organ političke stranke, potpisati ovlaštena osoba i mora se ovjeriti pečatom političke stranke.
- (3) Program utroška sredstava treba biti sačinjen na način da se osigura potpuna transparentnost planiranog trošenja sredstava.
- (4) Troškovi koje ostvari politička stranka i iskaže ih u poslovnim knjigama i finansijskom izvještaju, moraju biti uporedivi sa troškovima koje je politička stranka predvidjela u programu utroška sredstava, tako da se svaka stavka ostvarenih troškova može uporediti sa istom stavkom iz programa utroška sredstava.

- (5) Plaćanje obaveza iz ranijeg perioda ne treba biti obuhvaćeno programom utroška sredstava u tekućoj godini, jer su bile planirane i realizirane kao trošak u ranijim godinama, kada je političkoj stranci pružena usluga ili je politička stranka izvršila nabavku materijala.
- (6) Isplate po osnovu zajmova koje politička stranka planira u toku kalendarske godine ne predstavljaju trošak i ne trebaju biti obuhvaćene programom utroška sredstava.
- (7) Planirani interni prijenosi sredstava između organizacionih dijelova političke stranke ne trebaju biti obuhvaćeni programom utroška sredstava.

Član 3.

(Dostavljanje programa utroška sredstava Centralnoj izbornoj komisiji BiH)

- (1) Politička stranka je obavezna program utroška sredstava za tekuću godinu Centralnoj izbornoj komisiji BiH dostaviti do 31. 03. tekuće godine, skupa sa godišnjim finansijskim izvještajem za prethodnu godinu.
- (2) Ukoliko politička stranka Centralnoj izbornoj komisiji BiH ne dostavi program utroška sredstava za tekuću godinu, skupa sa godišnjim finansijskim izvještajem za prethodnu godinu, smatrat će se da je troškove koje iskaže u finansijskom izvještaju za tu godinu ostvarila bez programa utroška.
- (3) Ukoliko nakon donesenog programa utroška sredstava, usljed nepredviđene situacije u kojoj je politička stranka prinuđena odstupiti od svog plana, može napraviti rebalans svog programa utroška sredstava, te ga nakon usvajanja nadležnog organa stranke dostaviti Centralnoj izbornoj komisiji BiH.
- (4) Politička stranka je obavezna Centralnoj izbornoj komisiji BiH obrazložiti razloge za donošenje rebalansa programa utroška sredstava i dostaviti relevantne dokaze o novonastaloj situaciji.
- (5) Rebalans programa utroška sredstava politička stranka ne može praviti krajem poslovne godine, odnosno zabranjeno je da politička stranka troškove koje je ostvarila prepisuje u program utroška sredstava.
- (6) Ukoliko politička stranka Centralnoj izbornoj komisiji BiH dostavi rebalans programa utroška sredstava na kraju poslovne godine, odnosno kada su poznati ostvareni troškovi u toj godini, rebalans se neće uzimati u obzir. Ostvareni troškovi će se upoređivati sa programom utroška sredstava koji je politička stranka dostavila do 31. 03. tekuće godine.

Član 4.

(Postupanje u skladu sa programom utroška sredstava)

- (1) Finansijska sredstva iz člana 3. stav (1) Zakona o finansiranju političkih stranaka, politička stranka je obavezna koristiti isključivo za ostvarivanje ciljeva utvrđenih svojim programom i statutom, a u skladu sa finansijskim planom.
- (2) Politička stranka ne može planirati utrošak sredstava za lične potrebe članova stranke, kao i za druge aktivnosti koje nisu u skladu sa programom rada i statutom stranke.
- (3) Programom utroška sredstava politička stranka ne može planirati troškove u iznosima koji nisu realni za njene izvore finansiranja i obim poslovanja.

Član 5.

(Stupanje na snagu i objavljivanje)

Ovo Uputstvo stupa na snagu osam dana od dana objavljivanja u “Službenom glasniku BiH”, a objavit će se i u “Službenim novinama Federacije BiH”, “Službenom glasniku RS”, “Službenom glasniku Brčko distrikta BiH” i na internet-stranici Centralne izborne komisije BiH.

Broj: 03-02-2-67-1/22
Sarajevo, 13. 01. 2022. godine



Predsjednik

Željko Bakalar